

## **Ekainaren 29an greba orokorra**

**BADAKIGU ZEIN UNETAN BIZI GAREN.** Erreforma gogorak datozkigu. Bata bestea atzetik, "merkatuak" asetzeko. Zeintzu dira merkatuak? Finantza-boterea, benetan agintzen duena. Diru publikoa erruz erabilia salbu geratu diren lotsagabe horiek Zapaterori dei egiten diote, erreformak egin ditzala exigitzeko. Eta Zapaterok egin ditu. Eurei ez zaie ahaleginik eskatzen... Botere politikoak kapitalari men egiten dio, honen esanetara baitago. Hau ezin dugu onartu. Horren aurka greba orokorra deituko dugu ekainaren 29rako.

Gobernuek ase ezineko munstro horri eman diote jana; behin kutxa publikoak hustuta, gure eskubideen kontra ekiteko. Finantza-botereak eta patronal handiak agintzen du.

Politikan ELKARTASUN adierazpenik ez dago. Agintarien ahotan 'elkartasuna' hitz hutsa, gezurrezkoa, hipokrisia hutsa da... Ondo dakigu krisia ez dutela eragin ez gizarte-gastuak, ez lan-baldintzek. Baina helburua bat da: langabeziak eragindako izua baliatzea erreformak egin eta berriro errenta-transferentzia handi bat bideratzeko. Errenta gure poltsikoetatik kapitalaren eskuetara doa. Nola? Lan-merkatuko eta gizarte-arloko prekarietatea handituz, zerga-politika injustua eginez eta pribatizazioa areagotuta.

Aurre egin behar diegu eta gure eskubide laboral eta sozialak defenditu behar ditugu. Gure betebeharra da. Horrela jokatzeko dutenekin ez daukagu zerikusirik. Inongo zerikusirik. Eskubideak ez dira berez emandako zerbati. Eskubideak borrokatzen diren neurrian gauzatzen dira. Horregatik, egoera honetan, behin eta berriz erasotzen dituztenean, mobilizazioa beste biderik ez zaigu geratzen: Ekainaren 29an greba orokorra.

### **M-21eko Greba orokorra: ARRAZOIA GENUEN**

Duela urtebete baino gehixeago krisia zela-eta HIRU, EHNE, EILAS, ESK, LAB eta ELAK proposamenak partekatu genituen. Eta horrek balio handia du.

**M-21eko greban arrazoi genuen.** Greba botere politiko eta ekonomikoaren aurka egitera ausartu ginen. CCOO eta UGT ere aurrez-aurre jarri ziren. Greba orokor harekin asmatu egin genuen, eskuineko politikak eta beren arduradunak agerian utzi baitzituen. Asmatzea izan zen ere greba deitzen ausartzea, argi hitz egitea: eskuineko politikak aldatu beharra zegoen.

- Esan genuen orduan: politikak aldatu ezean murrizketak gure eskubide laboral eta sozialetan etorriko ziren. Arrazoi genuen; hemen ditugu murrizketak.
- Esan genuen ere gobernuetako alderdi politikoak aldatzen zirela, baina inondik ez egiten dituzten politika sozial eta ekonomikoak. Orain eskubide sozial eta laboralen kontrako murrizketa fasean daude, beldurra hedatzen dute, diziplina ezartzeko, eta berdin da gobernuan eskuinekoak ala sozialdemokrata izenekoak egon.

Gobernuek euren babeserako hesi bat egin dute; manipulazio itzela da oinarria, alternatibak ezkutatze eta eztabaida politiko nahiz soziala saihesteko.

## **EGOERAREN EZAUGARRIAK:**

**1.- ALDEBAKARREKO ERABAKIAK.** Mugimendu sindikalari esaten digute: "Nahi baduzu, zatozte nire atzetik". Ez dago elkarrizketa sozialik; antzezpen bat besterik ez da. Botere politikoa botere ekonomikoaren menpe dagoenez, "elkarrizketa soziala" erabat desitxuratu du; gaur egun gizartea kontrolatu eta desmobilizatzeko prozesu hutsa da. CC.OO.ek eta UGTk. Patronalari eta Gobernuari behar zuten denbora eman diete oraingo egoeraraino iristeko. Laguntzaile izan dira langile-klasearentzako desarmetik arriskutsuenean, desarme ideologikoan.

**2. GOBERNUK BAKARRIK UTZI GAITUZTE.** 'Alderdi bakarra'ren drama. Gobernuak kide izateko aukera dutenak bat datoz.

**3.- DOTRINA BAT EZARTZEN DUTE:** Murrizketa da bide bakarra, host, gizarte-gastua gutxitzea. Zerga-politikak egon beharko luke eztabaidaren erdigunean. Eskandalua da gertatzen dena. Europar adina ordainduko balira, estatuan 100.000 milioi gehiago bildu litezke, eta HEHn 5.300 milioi gehiago... Defizita ia desagertzearaino gutxituko litzateke... Betiko eskuin petoaren murrizketak dira.

**4.- ETENGABEKO PROZESUA:** Pentsioen erreforma prestatzen ari dira. Eskubide laboral eta sozial gutxiago, eta pribatizazio gehiago. Pobreago eta ahulago nahi gaituzte.

**5.- UNIFORMEA:** Herri-administrazio guztiak arrastaka eramaten ditu. Eta badu beste ondorio bat: autogobernu izpirik ere ez da geratzen. Ez dago autogobernurik. Defizita, zor publiko maila, funtzionarioen lan-baldintzak... Dena Madrilen erabakitzen da; dena da oinarritzakoa... Penagarria da, baina gurean bizi den eta lan egiten duen jendeak elkartasun politikak behar dituenean, autogobernua desagertu egiten da. Erakundeetako alderdi abertzaleek zer egiten dute? Lobby ekonomikoak sortzea bultzatzen du; hor dugu Gipuzkoa Aurrera. Lobby horien helburua politika gidatzea da.

**6.- PATRONALARENTZAKO BABESA.** Bera da pribilegio gehien duena. Zer gehiago behar du patronalak? Pribilegiozko kokapen horretatik lan-baldintzen gaineko xantaia egiten dute, eraso egiten diote negoziazio kolektiboari...

**7.- GURE LEKUA, SINDIKALISMO INDARTUA:** Gure lekua ez da, noski, politikaren bidelagun izatea; ezin diogu inongo babesik eman. Gertatzen ari denari 'elkarrizketa soziala' deitzeak azalpen bat du: hala hitz egiten dutenen menpekotasun finantzarioa. Sindikalismo errebindikatiboaren mobilizatzeko ahalmenak helburu bat du, politikak aldatzea, ez boterearekin tratutan ibiltzea mesede politikoei eskerrak euskal gehiengo errepresentatiboaren kontrako monopolio sindikala eratzeko.

## **ALDARRIKAPEN NAGUSIAK:**

### **1. ERREFORMA LABORALA.**

A. **NEGOZIAZIO PROZESUA.** Gizartearen kontrola eta desmobilizazioa zuen helburutzat. Iluna izan da, desinformazioz eta filtrazio interesatuz josia. Zapaterok esan zuenetik "funtsezko gaiak ukituko" zirela, guztiek zekiten azken emaitza zein izango zen. Eta patronala garaile, betiere. CCOO eta UGT lankide izan dira emaitza jakina zuen prozesu honetan; bazekiten erreforma 16an ministro kontseiluak onartuko zuela, eta 22an parlamentuan bozkatuko zela; horrela Zapaterori denborak administratzeko aukera eman diote.

B. **EDUKIAK.** Erreforma laborala lan-zuzenbidearen mamiari (ahulenak babestea) egindako eraso da.

a) Krisi hau patronalarentzako merkeena izan da jendea kaleratzerakoan (gehienek ez dute kalteordainik jaso, aldi baterako kontratuen ondorioz).

b) Gizakien lana salgai hutsa bihurtu nahi dute, erabili eta botatzeko moduko zerbait.

c) Lan-baldintza duinak dituztenen kaleratzeak erraztu eta merkatu nahi dituzte, langile prekarioekin ordezkatzeko.

d) Enpresarioei diru publikoa emango diete, langileak merkeago kaleratzeko.

e) Hitzarmen kolektiboa ez aplikatzeko modua onartuko dute.

f) Kolokazio enpresen lan mertzenarioa legeztatuko dute; irabazia pertsonekin trafikoa eginez lortuko dute.

C. **MOBILIZAZIOA.** Mobilizazioa erreforma hauen ardura duenaren kontra egin behar da; Zapateroren kontra, eta berarekin bat egiten dutenen kontra. Mobilizatu egin behar dugu kapitalaren menpe jartzen diren gobernuen aurka.

D. **EZEZKO BOTOA.** Euskal alderdiei exigitzen diegu aurkako botoa eman dezatela.

2. **GOBERNUA BABESTEKO 'elkarrizketa soziala' ren AURKA.** CC.OOek eta UGTk esan dute dagoeneko jarraitu egingo dutela Lopez eta Sanzi babesa ematen, era antidemokratikoan. Euskal gehiengoan kontrako gurutzadari ekin diote.

3. **LAN-HARREMANEN ETA GIZARTE-BABESAREN EUSKAL ESPARRUA:** Tresna politiko eta ekonomikoak behar ditugu, eta indar-erlazio jakin bat behar dugu, tresna horiek elkartasunaren alde ipintzeko.

4. **ZERGA-PRESIOA HANDITZEA (EBko batez besteko mailaraino).** Saiatu egin behar dugu hau eztabaida sozialaren erdigunean kokatzen. Hain garrantzi handiko gaia ezin da arinkeriaz hartu. Datorren asteazkenean bilduko dira aldundiak eta Eusko Jaurlaritza Zergak Koordinatzeko Organoan, bat datozen kontu bati ekiteko: "zergak ukitu baino lehenago murrizketa asko egin behar" omen dira. Hau lotsagarria da.

5. **PARTE HARTZEA.** Eztabaidarik eta informaziorik ez dagoenean, zertan geratzen da demokrazia? Guk politikan sinesten dugu, eta parte hartzeko aukera izan nahi dugu, gure iritzia emateko.

**KONKLUSIOA:** Ez dago beste biderik. Erreforma laborala latza dator, eta bere tankerako erantzun bat eskatzen du. Hala uste dugu greba orokorraren ardua iritsi dela eta ekainaren 29rako deituko dugu greba orokorra.